



BOSNA I HERCEGOVINA
VIJEĆE MINISTARA
Generalno tajništvo

Broj: 05-50-1-1797/10
Sarajevo, 19.8.2010. godine

 **BOSNA I HERCEGOVINA**
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 19-08-2010			
Organizaciona jedinica	Klasifikaciona oznaka	Redni broj	Broj priloga
01-	50-1-15-	78/10	

PARLAMENTARNA SKUPŠTINA BiH

- Zastupnički dom -

SARAJEVO

PREDMET: Odgovor na zastupnička pitanja – dostavlja se

Vijeće ministara Bosne i Hercegovine, na 130. sjednici održanoj 19.8.2010. godine, utvrdilo je Odgovor na zastupnička pitanja koja je postavio gosp. Šefik Džaferović, zastupnik u Zastupničkom domu Parlamentarne skupštine Bosne i Hercegovine.

U prilogu dostavljamo Odgovor uz molbu da isti uručite zastupniku.

S poštovanjem,

 **GENERALNI TAJNIK**
Zvonimir Kutleša



**BOSNA I HERCEGOVINA
VIJEĆE MINISTARA**

Broj: 05-50-1-1797/10
Sarajevo, 19.8.2010. godine

ŠEFIK DŽAFEROVIĆ, poslanik u Predstavničkom domu Parlamentarne skupštine Bosne i Hercegovine, na **78.sjednici** Predstavničkog doma Parlamentarne skupštine BiH održanoj **25. maja 2010.godine**, postavio je Ministarstvu sigurnosti BiH sljedeće poslaničko pitanje:

„1.U kojoj fazi se nalazi uspostava Agencije za forenzička ispitivanja i vještačenja? Posebno da li je Agencija uradila strateški dokument vezan za potrebe agencija za provođenje zakona za pojedinim vrstama vještačenja, neophodne opreme, ljudskim resursima, te finansijskim sredstvima potrebnim za rad. Ovo s obzirom na činjenicu da Agencija treba da postane servis agencijama za provođenje zakona.

2.Da li je napravljen plan za strateškim preuzimanjem ljudskih resursa i tehničkih kapaciteta iz agencija i organa za provođenje zakona u mjeri u kojoj se preuzimaju njihove nadležnosti? Ako nije, kada će se to uraditi? Ovim bi se omogućio kontinuitet u radu laboratorija, te izbjeglo nepotrebno gubljenje vremena i sredstava. Preuzimanje ljudstva desilo se u svim formiranim agencijama na državnom nivou u mjeri u kojoj je došlo do preuzimanja poslova.“

Na postavljeno pitanje, Vijeće ministara Bosne i Hercegovine je na **130.sjednici** održanoj **19.8.2010.** godine, utvrdilo sljedeći

ODGOVOR

Agencija za forenzička ispitivanja i vještačenja je uputila je odgovor sljedeće sadržine:

Zakonom o Direkciji za koordinaciju policijskih tijela i o agencijama za podršku policijskoj strukturi osnovana je Agencija za forenzička ispitivanja i vještačenja, čiji su direktor i zamjenik direktora imenovani na 78. sjednici Vijeća ministara BiH, održanoj 26.02.2009.godine. Na istoj sjednici odlučeno je da sjedište Agencije bude u Istočnom Sarajevu. Vijeće ministara je na 95.sjednici održanoj 29.07.2009.godine, donijelo Odluku da se Agenciji za forenzička ispitivanja i vještačenja za trajni smještaj dodijeli radni prostor u novoizgrađenom objektu Državne agencije za istrage i zaštitu, površine od oko 1135 metara kvadratnih, građevinski završen prema ranijoj namjeni.

Kako bi smanjili troškove za smještaj Agencija se iz iznajmljenog, 01.07.2010.godine, preselila u novi radni prostor (zgrada SIPA-e), koji je potrebno prilagoditi djelokrugu rada i nadležnostima Agencije. S tim u vezi, ovih dana su u toku aktivnosti za izbor najpovoljnijeg izvođača radova na projektiranju i prilagođavanju radnog prostora specifičnim laboratorijskim potrebama prema predviđenim standardima u ovoj oblasti. Zbog osjetnog umanjivanja racionalno predloženog budžeta za 2010.godinu, Agencija je bila prinuđena odmah pristupiti njegovom prestrukturiranju kako bi mogla finansirati potrebne aktivnosti na unutrašnjem uređenju prostora.

Pravilnik o unutrašnjoj organizaciji i sistematizaciji Agencije, nakon blagovremeno provedene propisane procedure i dostavljanja Vijeću ministara BiH na usvajanje (juni 2009.godine), konačno je usvojen tek **22.04.2010.godine**, što se nepovoljno odrazilo na dinamiku kadrovskog popunjavanja i opremanja visokosofisticiranom opremom. Inače, prilikom izrade Pravilnika vodilo se računa da se ne dupliraju kapaciteti sa dostignutim nivoom razvoja kriminalističko-tehničkih centara entitetskih MUP-ova. Tako će Agencija u svom početnom razvoju prioritet dati razvoju bioloških i DNK vještačenja, forenzici kompjuterskih sistema, fonetskim vještačenjima i grafološko/grafoskopskim vještačenjima, čime bi se izbjeglo eventualno preuzimanje nadležnosti kriminalističko-tehničkih centara MUP-a RS ili MUP-a Federacije BiH.

U augustu 2009. godine sačinjen je Plan opremanja Agencije forenzičkom opremom sa konkretnim finansijskim planom i dinamikom nabavke, kao i potrebnim kancelarijskim namještajem i informatičkim sredstvima (određena oprema već je nabavljena). Projekat uspostavljanja laboratorije za forenziku zvuka (glasa) podržala je i Vlada Španije sa odobrenom donacijom (u novembru 2009.godine) u iznosu od 65 000 eura, uz obuku kadrova.

Pored toga, očekuje se stav Ministarstva sigurnosti BiH u vezi trajnog raspolaganja i korištenja opreme za DNK analize, koju je 2006.godine Ministarstvu sigurnosti donirala Evropska unija. Trenutno je pomenuta oprema, na osnovu Memoranduma o razumijevanju, privremeno smještena u prostorijama MUP-a Federacije BiH.

U maju 2010. godine, sačinjen je Akcioni plan kadrovske popune Agencije za period 2010.-2011.godina na koji je, u skladu sa procedurom, saglasnost dalo Ministarstvo finansija i trezora BiH. Ovaj dokument je upućen Vijeću ministara BiH na usvajanje. S tim u vezi u pripremi su javni konkursi za zapošljavanje u Agenciji, pri čemu će se, pored stručnosti i radnog iskustva, u vidu imati i nacionalna struktura kandidata. Takođe će se voditi računa o stručnim kadrovima koji pokazuju interes za nastavak svojih radnih aktivnosti u Agenciji za forenzička ispitivanja i vještačenja i za to dobiju potrebne saglasnosti od matičnih agencija. **Pri tome ne postoji potreba sačinjavanja plana za strateškim preuzimanjem ljudskih resursa i tehničkih kapaciteta iz agencija i organa za provođenje zakona u mjeri u kojoj se preuzimaju njihove nadležnosti.**

U skladu sa Programom rada Vijeća ministara za 2010. godinu, urađena su dva značajna i sadržajna dokumenta koja, u suštini, predstavljaju strateške dokumente bitne za razvoj ove značajne institucije sigurnosti, a to su: **Program rada Agencije za forenzička ispitivanja i vještačenja za 2010.godinu** (februar 2010.god.) i **Neki aspekti razvoja Agencije za forenzička ispitivanja i vještačenja** (maj 2010.god.). U pomenutim dokumentima su na jasan način prezentirane projektirane aktivnosti kadrovskog popunjavanja, materijalno-tehničkog opremanja, te finansijske potrebe za realizaciju planiranog.